

I studenc dla IUAV studia i frabricac d'Ampez

Colaborazion anter l comun da Cortina y l'université de Aunejia per la realizazion dl plan dla contreda, prevedù da directives europeiches y regionales

Ampez - Al à inom Giorgio Nubar Gianighian y al é n professor dla université de architettura IUAV de Aunejia. Si pere, Raphael Gianighian, fova originar d'Armenia, sia oma, Dina Ghedina, fova ampezana. Te Ampez à l professor sies rajjes. Mete da jì n projet, deberieda con si scolés, tl paisc olà che sia oma é chersciuda su, à per al na significat plu sot. La proposta dl assessour a l'urbanistica Adriano Verocai ne n'è Gianighian nia podù refudé.

I studenc dla unversité IUAV de Aunejia é ruvés per la pruma outa a Cortina tratant la fin dl'edema dl 17 y 18 de november. Sot les directives dl professor, ài fat na pruma valutazion di frabricac de Ampez: l prim vare de n projet, dla dureda de trei agn, che portarà i studenc a fé n stude plu sot dl sistem urbanistich y dl paesaje de Cortina. La colaborazion anter l'université y la Consulta per l Paesaje à sciche fin la redazion dl plan dla contreda (plan paesajistich), prevedù da directives europeiches y regionales. "L projet nasc da la proposta dl assessour Verocai, che à damané la colaborazion de nosta université (en particular dl curs de 'Restauro urbano', tegni tl prim semester dal prof. Gianighian, ndr) per realisé l plan dla contreda dl comun de Ampez." La proposta é vegnuda tutta su con gran legrezza dai studenc che, podan laoré sun l post, a n projet concret, desmontra na motivazion plu grana. L professor nes conta di trueps projec de chesta sort che al à bele fat deberieda con si studenc tratant sia cariera: "I é

tout su la proposta dl assessour ajache i é bele fat trueps projec analogs, per ejempl a L'Aquila, olà che i on relevé les ruines per capi sse al fova la poscibelté de fé n restaur. O a Katmandù, olà che i é relevé, deberieda con mi scolés, l patrimoine vernacolar de 4.000 ciases ti raions patrimoine dl'umanité Unesco." Ciamò na outa à Gianighian volù porté si scolés sun l post, per laoré a n projet concret, con na motivazion emplù.

Normes y prinzijs per realisé l plan dla contreda

L prim vare de chest projet à conduit za. 80 studenc de architettura a Cortina, olà che ai à fat ju y studié l patrimoine urbanistich. "Aldidancuei é l laour plu sauri per merit dles technologies. 'Google maps' nes dà p.ej. la poscibelté de vedei i frabricac ence te nostes aules, te nostes ciases, zenza messei jì sun l post." I frabricac mess vegni studiés - mé da de fora te chest caje - sun la basa dl'epoca y di materiai de costruzion, dla sort de ciasa, de sies carateristiches, ma ence de chel che é entour via, sciche legns da frut, ourc o sieves. Al é vegnù valuté sciche ai s'è mantegni tl temp, ma ence sciche ai é vegnù restaurés, conservés te sies carateristiches o restés vitimes de azions speculative.

I dac cueius adum dai studenc é vegnù metus ite te n sistem informatif teritorial, te na banca de dac. La gran quantité de informazions é la fundamenta de chest stude, che portarà a la



L professor Giorgio Nubar Gianighian.

definizion de regoles, normes y prinzijs sun la basa de chi che l comun de Ampez podarà realisé l plan dla contreda, per garanti la conservazion de n patrimoine urbanistich che à na gran valuta.

Studié ence la architettura plu nueva

L stude dl patrimoine urbanistich de Cortina d'Ampez porta donca a la descuerida de na fundamenta storica, a la ricostruzion dla storia di frabricac vedli che é ciamò

aldidancuei. "L projet se slariarà fora y ne tolarà nia demé en considerazion la architettura plu vedla y chela firmada dal architet Edoardo Gellner. - preziseia Gianighian - Al vegnirà studié ence frabricac fac su con n stil plu joen, desche l liberty o l razionalism, che fej oramai ence pert dl patrimoine y dl paesaje dla val de Ampez."

Per "ruralisé" Ampez

Ampez é scialdi mudé ti agn. La val, dedicheda enlaouta dantaldut a la agricoltura, vif aldidancuei de turism. Les enrescides sun l paesaje agrar storic tla val d'Ampez, fates dai architec - ex studenc dl professor Gianighian - Matteo Apollonio y Fabrizio Lucchetti per sia tesa de laurea, é na basa emportanta per l stude. I contegnus dles does teses vegnirà confrontés con i dac cueius adum dai studenc aldidancuei, per capi co che la contreda de Cortina se à mudé y per mete dant n valgunes regoles per la conservazion y l miorament dl paesaje d'aldidancuei. I dé endò ai ampezans chela cultura agrara da enlaouta che é encuei oramai jida perduda, é un di obietifs dl laour che l professor se à tout dant. "Enlaouta ova vigni ciasa n ourt y legns da frut. Chisc podessa endò vegni portés ite tla edilizia nueva, per i dé derevers a Ampez chela ruralité che la Cortina nueva, chela turistica, ne n'è nia plu", dij Gianighian. Do sia minonga à chest n valour samben ence turistich, ma i dà souraldut zeruch ai ampezans n toch de sia cultura.

Segur dla emportanza de chest projet per i dé endò a Cortina chel aspet rural che é prest n pue' vegnù desmentié via, é ence l assessour a l'urbanistica Adriano Verocai. "Chest projet é na bona ocasion per incentivé endò la agricoltura,

che à caraterisé la vita te nosta valeda per trueps agn", dij l assessour, che enjonta: "L laour metù man, en colaborazion con l'université de Aunejia, é dret emportant per Ampez, n laour che fajarà plu scemples les procedures dla comiscion da frabiché, che tolarà demez trueps limitazions y miorarà la cualité dl ambient y dl paesaje." Verocai à volù sotlinié che per la realizazion dl stude anuzèia i studenc la "Ladinia Map", mapa realisada da la Lia di Comuns Ladins, na mapa dret prezisa, che pò vegni aplichada ai sistems informatifs plu moderns y, chilà, te n projet de gran relevanza. L plan dla contreda é vegnù metù dant da directives europeiches y regionales. L comun da Cortina à volù se porté inant y dé vita a chest projet per evité che al vegnes n di dé dant dal aut. Dapò i trei agn de stude vegnirà l plan fat fora deberieda con la Souraintendenza ai Bens Culturai dla Region Venet y darà la poscibelté de mete ju l "Codice d'Onorato" de Cortina d'Ampez. (kp)



L assessour a l'urbanistica dl comun de Ampez, Adriano Verocai.

"L sonn fodom"

Concors metù da jì da La Usc di Ladins.

Concors de fotografia



Manéde vostes fotografies a la miscion e-mail katia.usc@rolmail.net o per posta a la miscion: Redazion "La Usc di Ladins", Self dei Ladins c/o ex Hotel Dolomiti, 32020 Fodom/Livinalongo (BL). Les fotos vegnirà ence publicades sun la plata de Facebook "L sonn fodom tla Usc" olà che duc podarà dé ju si aprijament. Chisc vegnirà toc en considerazion da la giuria per la valutazion finala.



"Cialé l levé del sorogle da la ponta de Sas de Stria." Foto de Mariangela Sartorazzi da Brenta.